

Pelajar cemerlang antara peserta daftar di UUM

Oleh DALIZA ARIFFIN

um 15/3/05 12:6

SINTOK 14 Mac — Pelajar cemerlang yang memperoleh 10A dalam peperiksaan Sijil Pelajaran Malaysia (SPM) 2004, Roshamiza Roslan, 18, dari Langgar, Alor Star adalah antara yang mendaftar untuk menyertai Program Latihan Khidmat Negara (PLKN) di Kem Sintok, Universiti Utara Malaysia (UUM) mulai hari ini.

Beliau yang memperoleh 7A1, 3A2 dan 1B dalam peperiksaan tersebut merupakan antara 403 peserta PLKN Kumpulan 2 Siri 2 2005 yang melaporkan diri bagi mengikuti latihan di kem berkenaan di sini.

Roshamiza yang bercita-cita untuk menjadi jurutera kimia telah bersedia dari aspek mental dan fizikal untuk menghadapi pelbagai latihan dalam program itu nanti.

"Saya tidak menyangka yang saya akan terpilih mengikuti program ini dan saya akan menggunakan peluang keemasan ini sebaik-baiknya untuk menimba seberapa banyak pengalaman dan ilmu.

"Walaupun ini merupakan kali pertama saya berpisah dengan keluarga selama tiga bulan namun saya tetap gembira dan berhasrat agar ia akan menjadikan saya lebih berdisiplin, berkeyakinan, patriotik dan bersemangat kental serta hidup berdikari," katanya di sini.

Bekas pelajar Sekolah Menengah Sultanah Asma, Alor Star itu juga berharap dapat menyesuaikan diri dengan persekitaran dan rakan-rakan baru sepanjang program tersebut berlangsung.

"Walaupun latihan belum lagi bermula namun saya yakin program ini amat mencahbar dan menyeronokkan", katanya lagi.

Semangat

Perasaan sama turut dikongsi Leong Pei Wen, 18, bekas pelajar Sekolah Menengah Gurun, Kedah yang yakin melalui latihan dalam program tersebut akan meningkatkan semangat dirinya untuk lebih berjaya.

Pei Wen, anak seorang tukang besi dari Sungai Limau, Yan memperoleh 5A dalam keputusan SPM yang diumumkan Khamis lalu, mendapat sokongan keluarga untuk menyertai program berkenaan.

Ini dapat dilihat daripada kehadiran bapanya, Leong Kam Wah, 51, pada sesi pendaftaran peserta di kem berkenaan di sini.

"Saya tidak bimbang untuk melepaskan anak saya kerana PLKN bukanlah program yang mendera peserta malah paling berkesan memupuk perpaduan kaum di Malaysia dan mampu memberi manfaat yang besar kepadanya," kata Kam Wah.

Sementara itu, seorang peserta dari Pendang, Lim Soo Ting, 18, yakin akan dapat menyesuaikan diri dengan suasana persekitaran baru di kem latihan itu.

"Walaupun perasaan bercampur baur antara sedih, gembira dan gementar mengenai bentuk latihan yang bakal dilalui tetapi ia tidak sedikit mematahkan semangat untuk berjaya mengikut segala bentuk latihan nanti," kata bekas pelajar Sekolah Menengah Kebangsaan Tokai yang bercita-cita untuk menjadi pegawai farmasi itu.

Seramai 26,843 peserta PLKN melaporkan diri bagi mengikuti latihan di 71 kem di seluruh negara bermula hari ini hingga 3 Jun depan.